

**Le Divorce satyrique, ou les Amours de la Reyne Marguerite de
Valois**

**Publié sous le nom D.R.H.Q.M. *
Par Pierre Marteau, éditeur, Cologne, 1693**

*NOTES

Ce pamphlet anonyme a été publié au moment du retour à Paris de Marguerite de Valois à l'issue de sa longue détention à la forteresse d'Usson en Auvergne (cf. « [Margot reine d'Usson](#) », Alain Mourgue, éditions Le Manuscrit, Paris 2008).

Il a été publié pour la première fois à partir de 1660 sous l'énigmatique signature D.R.H.Q.M.. Ce texte a d'abord été repris dans le « [journal du règne de Henri III](#) » puis intégré aux « Mémoires » d'Agrippa d'Aubigné à qui ce pamphlet a été longtemps attribué. Il semble établi aujourd'hui que le véritable auteur soit Pierre-Victor Palma Gayet (1525-1610).

C'est aux Roys à faire les loix, disent les tyrans & ceux dont la force & non pas l'amour regne sur les peuples : Mais je ne loüe point, ni approuve cet axiome, encore que les armes & la violence m'ont rendu l'heritage & le sceptre de mes peres, Dieu benit la douceur la douceur, fait prosperer les desseins de ceux dont les actions sont autant aymées que redoutées, & seray mon tesmoin si vos cœurs ingrats s'en rendent mesconnaissants, que j'ay pardonné à plus d'ennemis, que vengé d'injures, aux yeux de tout le monde, comme à la France, à Paris, ma clémence & ma debonnaire benignité n'ayant pas absous seulement les perturbateurs de l'Estat, de leurs crimes, mais aussi remis mon particulier intérêt à ceux qui temerairement ont osé attaquer mon nom. J'ay cette obligation, au bonheur, d'avoir glorieusement veu la fin des troubles de mon Royaume, d'avoir expérimenté la foy de mes bon sujets, d'avoir établi pour long-temps une heureuse paix avec mes voisins, & d'avoir esteint mes ennuis plus particuliers par le moyen d'un divorce, qui separe de ma maison, ainsi que du cœur, celle dont l'infamie a longuement obscurcy ma reputation. Je sçay que plusieurs Estrangers, & plusieurs François mal-affectionnez, trouvent fort estrange qu'apres vingt-huit ans de mariage, un pretexte de parentage ait délié ce qu'un sacrement si digne avoit conjoint : les uns m'en appellent voluptueux, les autres Athée, & tous ensemble mesconnoissant : il faut que j'esclaire à leur ignorance, & que je confonde leur caute malice, cachant ma juste douleur, & déployant les dignes raisons que j'avois par honneur voulu déguiser à la renommée, avec des paroles exquisés, ambiguës & recherchées : Ma grandeur m'expose, & me met en veüe, & l'intégrité de ma conscience fait trouver bon qu'un chacun lise mes œuvres, afin que les malins & mal-informez n'attribuent à tort aux délices, à la religion ni à l'ingratitude, encore qu'elle soit des dépendances de la Couronne, ce que des causes plus pregnantes & recevables excusent.

Une pluye de sang au mont Aventin durant la Romaine superstition, presagea la défaite de Canes ; & un torrent de sang respandu par toute la France à mes tristes nopces, predit la défaite de mon honneur : le Ciel qui voit clair à nos adventures en donne souvent quelque connoissance avant le succez, & les sages évitent le péril par la prévoyance. Je voyois le jour au travers de mon infortune, & toutes choses taschoient de m'en esclaircir : mais je n'ay pû fuir mon dommage, encore que le Roy Charles pour lors regnant, à qui l'humeur de sa sœur estoit prou connüe, m'en donna quelque sentiment dessous cet oracle, lors qu'asseurant les Huguenots, pour les attrapper & les allecher d'une feinte paix, il protestoit sous mille serments, qu'il ne donnoit pas sa Margot seulement pour femme au Roy de Navarre, mais à tous les heretiques de son Royaume. O Prophetie trop veritable, & digne d'une sainte & divine inspiration ! s'il eust mis le général & non le particulier, & qu'au lieu des Huguenots seuls, il eust compris tous les hommes : car il n'y a forte ou qualité d'iceux en toute la France avec qui cette dépravée n'ait exercé sa lubricité ; tout est indifférent à ses voluptez, & ne lui chaut d'aage, de grandeur, ni d'extraction, pourveu qu'elle soule & satisfasse à ses appetis, & n'en a jusques icy depuis l'aage d'onze ans desdit à personne,

auquel aage Antragues, & Chatrins (car tous deux ont creu avoir obtenu les premiers cette gloire) eurent les premices de sa chaleur, qui augmentant tous les jours, & eux n'estants point suffisans à l'esteindre, encore que Antragues y fist un effort, qui luy a depuis abregé la vie, elle jetta l'œil sur Martigues, & l'y arresta long-temps, qu'elle l'enrolla sous son Enseigne, & en donnerent l'un & l'autre tant de connoissance, que c'estoit le discours & l'entretien commun de tous les soldats dans les armées où l'on connoissoit ledit Martigues outre sa valeur pour Colonel de l'Infanterie. Plusieurs d'entre vous, vous souvenez bien d'une escharpe de broderie, d'un petit chien qu'il portoit ordinairement aux sieges & aux escarmouches plus dangereuses, & n'ignorez pas d'où partoient ses amoureuses faveurs qui continuerent jusques à la mort, après laquelle il falut que par l'entremise de Madame de Carnavalet, Monsieur de Guise en passat les mains, jeune prince, brave & ambitieux, lequel commençant desja de construire cette machine qui trop tost esbranlée luy chêra dessus, songeoit de parvenir de ses impudiques baisers aux nopces, & d'en fortifier ses pretextes & ses desseins, ayant rompu dextrement le traité de mariage d'elle & du Roy de Portugal desja fort avancé & en tous termes, par le moyen du Cardinal de Guise son oncle, envoyé l'an mil cinq cents soixante huit en Espagne, pour se condouloir de la part du Roy tres Chretien avec le Roy Catholique de la mort de la Reyne Isabeau de Valois sa femme, Princesse autant vertueuse & sage, que cette sienne sœur vitieuse & folle ; & de laquelle les inconstances sont si frequentes, que l'examen de sa memoire mesme erreroit à compter ses fautes ; celles-cy scay-je bien toutefois, qu'elle adjousta tost apres à ses sales conquestes ses jeunes freres, dont l'un, à sçavoir Franois, continua cet inceste toute sa vie ; & Henry l'en desestima tellement que depuis il ne la put aymer, ayant mesmes à la longue apperceu, que les ans au lieu d'arrester ses desirs augmentoient leurs furies, & qu'aussi mouvante que le Mercure elle bransloit pour le moindre object qui l'approchoit. Voila la pucelle que mes proches, & le bien commun, me firent prendre pour belle & bonne, à son grand mescontentement & de ses favoris, entre lesquels Antragues, comme le Mareschal de Retz m'a autrefois dit, qui faillit à mourir de regret, ou d'un lâchement de sang que la violence de la douleur de nous voir mariez luy provoquoit par divers endroits : Mais le temps qui guerit de toutes choses, le guerit aussi & le pourveut pour plusieurs années, d'une moins belle, mais plus constante Maistresse ; & elle de divers serviteurs, dont l'un toutefois, à sçavoir la Molle, s'en trouva marry, car sous pretexte de tremper en quelque conspiration, dont furent accusez les Mareschaux de Montmorency & de Cossé, en laissa la teste à Saint Jean en Grève, accompagnée de celle de Coconas, où elles ne moisirent ni ne furent pas long-temps exposées à la veüe du peuple ; car la nuit venant ma preude femme, & Madame de Nevers sa compagne, fidèle amante de Coconas, les ayant fait enlever, les porterent dans leurs carosses enterrer de leurs propres mains dans la Chapelle Saint Martin qui est sous Montmartre, laissant cette mort de la Molle maintes larmes à sa Maistresse, qui sous le nom d'Hiacinte, a longuement sospirer & chanter ses regrets, nonostant les frequentes & nocturnes consolations de Saint Luc, que nous avons veu depuis arriber par fois inconnu & desguisé à Nérac jusqu'à ce que Bussi luy en fit oublier la perte, qui a esté par elle decouverte, quelque reputation qu'il eût

d'estre brave parmy les hommes, & de ne l'estre parmy les femmes, à cause de quelque colique qui le prenoit ordinairement à minuit, cette dégoustée déguisant en quelque façon son appetit de diverses sauces, s'en prit à Monsieur de Mayenne, bon compagnon, gros & gras, & voluptueux comme elle, & sont tousjours depuis demeurez bons amis en toutes leurs rencontres ; bien furent-ils quelque temps broüillez pour une lettre escrite à la Vitry : où il promettoit de preferer le Soleil à la Lune : mais toutes choses pacifiées le maltalent en demeurant seulement sur la Vitry, qui pour cela ne laissa pas de trouver party, non plus que cette pleine Lune, dont je n'ay jusques icy deduit que les vertus, ni par modestie compté la disme de ceux que la renommée rend participans de ses secrettes faveurs, me contentant seulement, que je sçay fort bien qu'elle ne voudroit ni ne sçauroit desadvoüer. A ses premiers Amans succederent doncques en divers temps (car le nombre m'excusera si je faus à les bien ranger), ce grand degousté de Vicomte de Turenne, que comme les precedens, elle envoya bien-tost au change, trouvant sa taille disproportionnée en quelque endroit, l'acomparant aux nuages vuides qui n'ont que l'apparence dehors ; dont le triste amoureux au desespoir, apres un adieu plein de larmes, s'en alloit perdre en quelque lointain region, si moy que sçavois ce secret, & qui pour le bien des Eglises feignois pourtant de n'en rien sçavoir, n'eusse très-expressément enjoint à ma chaste femme de le rappeler : ce qu'elle fit très-mal-volontiers, desirant de tout temps pour la vanité, que quelque lourdaut se romput le col à son occasion : mais il n'est gueres plus de ces sots depuis qu'on s'en mocque ; car de manger de rage les plumes de son chapeau, comme la Bole, & casser en colere une bouteille d'encre aux yeux des Dames, comme Clermont d'Amboise, ce sont petites rages & jalousies qui n'estoient que trop ordinaires chez nous, & que consentant à mon déshonneur, je sçavois & voyois clairement, donnant par cette tolérance aux uns & aux autres souvent le courage, & les commoditez de faillir ; elle le sçait bien, & plusieurs de vous qui tenez la main à ses gentillesses, aussi je ne suis point tellement aveuglé moy-mesme en un fait si sensible & si apparent, que je n'apperceusse comme les autres, que Clermont maintefois la baisoit toute en juppe sur la porte de sa chambre, tandis que le soir, pour luy donner loisir de se mettre au lit, je joüois ou me promenois avec ma noblesse dans la salle. Que direz-vous, fâcheux maris, de cette souffrance ? n'aurez vous point de peur, que vos femmes vous laissent pour venir à moy, puisque je suis ainsi amy de nature ? ou n'estmerez vous point plustot que ce fût quelque lâcheté ? vous aurez raison de le croire, & moi de vous l'avoüer, si considerant que j'avois pour lors plus de nez que de Royaume, & plus de paroles que d'argent, vous m'approuvez, que j'avois besoin de toutes mes pieces, & principalement de faire & conserver des amis, ou bien les perdre & n'en point acquerir : la consideration de cette Dame, telle qu'elle est, flechissoit ses frères & la Reyne sa mere aigrie contre moi ; sa beauté m'attiroit force Gentils-hommes, & son bon naturel les y retenoit : car il n'estoit point fils de bon lieu, ni gentil compagnon, qui n'avoit une fois en sa vie été serviteur de la reyne de Navarre, qui ne refusoit personne, acceptant ainsi que le tronc public les offrandes de tous venans : il est vray que de quelques-uns elle se mocquoit, comme vous direz de ce vieux rufien de Pibrac, que l'amour avoit fait devenir son Chancelier, duquel pour en rire elle me monstrois les lettres.

Je connois à vos yeux, ennemis de société, que si vos femmes vivoient ainsi, vous seriez en peine & paraventure iriez vous au Conseil de Chaune ou de Villeclair, pour sçavoir comment on s'y gouverne : mais je n'eus jamais cette volonté, quoy qu'on me conseillât, quoy qu'elle craignit, ni quoy que les Astronomes plus entendus vissent, & conneussent au Ciel, & au point de son horoscope : je sçavois fort bien que dès le 21, jusques au 28 de Mars de l'an 1560 sa nativité la jugeoit mourir de ma main pour raison d'honneur ; mais une certaine prescience de nostre future separation, ou, pour mieux dire, une certaine prudence humaine, me fit divertir les effets des affections & impressions des Astres, continuans tous deux comme devant, my ma bonté naturelle, & elle son opiniastre inclination à la volupté, laquelle pour exercer avec plus de délices, & hors des rudesses de la toille, cette impudique a d'autrefois couché avec son Seigneur dans un lit éclairé de divers flambeaux, entre deux linceuls de taffetas noir, accompagnez de tant d'autres petites voluptez que je laisse à dire : ce fut lors qu'elles conçurent de ces mignardises non pas une Lyna comme Uranie, dont à tort elle usurpe le nom : mais bien cet Esplandien qui vit encores, & qui sous des parens putatifs promet de réüssir quelque chose de bon un jour. Ne vous estonnez plus, si poudreux & suant au retour de la guerre, de la chasse, ou de mes autres violens exercices, elle avoit mal au cœur de me caresser, jusques à changer les draps, où nous n'avions seulement demeuré qu'un quart d'heure ensemble, puisque son désir se paissoit de ces friandises, & ne l'attribuez plus comme comme vous souliez à cette facheuse senteur de l'aisle & du pied dont elle m'accuse, ni au desdain de nostre disparité, bien que vous ayez apperceu quelquefois qu'elle me prisat & desestimât les miens, jusques à me répondre un jour, que je voulois que Madame de Tirans mangeât à sa table (car c'estoit le privilege de mes parens), qu'il falloit plustost doncques qu'avec un bassin rempli d'eau, & une serviette ou tablier devant elle, ils se laissassent laver les pieds, voulant inférer que c'estoit des gueux, & qu'elle s'en alloit faire la Cène, ne se souvenant pas (avec supportation de mes nouveaux alliez), qu'à Florence elle a cent Mercadans qui luy sont plus proches de vingt degrez, que pas un allié des illustres maisons de Foix ou d'Albret n'est proche de Bourbon : elle a bien depuis ravallé de gloire, & changé de devise, ainsi que vous orrez de fil en esguille, s'il ne vous ennuye de m'escouter & d'entendre une partie de ses fortunes.

Depuis qu'elle fut honteusement sortie de Paris, d'où un Capitaine des Gardes la fit partir, après avoir fouillé jusques dans sa litière, & regardé qui l'accompagnoit, & si Madame de Duras, & de Béthune, Secrétaires de son Cabinet, y estoient, pour les en chasser : cet affront luy fit peur, & lui fit tellement craindre pis, qu'elle fut quelque temps vivante avec la vergogne de ses péchez : mais estant mal aisé que le poisson ne revienne à l'hameçon, & le corbeau à la charogne, ce haut-de-chausse à trois culs se laisse derechef emporter à la lubricité & débordée sensualité, me quittant sans mot dire & s'en allant à Agen, ville contraire à mon party, pour y establir son commerce, & avec plus de liberté continüer les ordures, mais les habitants presageans d'une vie insolente d'indolens succez, luy donnerent occasion de partir avec tant de haste, qu'à peine se put-il trouver un cheval de croupe pour l'emporter, ni des chevaux de louage ni

de poste pour la moitié de ses filles, dont plusieurs la suivoient à la file, qui sans masque, qui sans devantier, & telle sans tous les deux, avec un desaroy si pitoyable, qu'elles ressembotent mieux à des garces de Lansquenetz à la route d'un Camp, qu'à des filles de bonne maison ; accompagnée de quelque noblesse aharnachée, qui moitié sans bottes, moitié à pied, la conduisirent sous la garde de Lignerac aux monts d'Auvergne dans Carlat, d'où Marze son frere estoit Chastelain, place forte, mais ressentant plus sa tanniere de larrons que la demeure d'une Princesse, fille, sœur & femme de Roy.

Je rougis, & rememore à regret tant d'indignitez, sçachant bien que les faits des Grands ne meurent jamais, & qu'apres mille siecles, un siecle moins vicieux s'esmerveillera que le notre ait produit un monstre au lieu d'une femme, & le vitupere d'un si beau sexe de la semence des Oincts de Dieu.

J'esperois avant cette dernière boutade, ayant tant de preuves de son naturel inconstant qui se lasse de tout, qu'enfin elle se deust lasser d'une si continuë dissolution, & que le gré de me voir oublier le présent comme le passé la deust gagner & vaincre d'obligation. J'en ay perdu, comme vous voyez, & ma douceur & ma peine, & ne m'en reste que le regret d'avoir veu ma maison souillée, & l'apprehension de servir de sujet à ceux qui gravent nos noms à l'Eternité, outre l'ennuy d'estre desja vieux, & de voir à son occasion cette petite famille dont Dieu a beni nostre separation, en un si bas aage, qu'elle ne puisse regir aprez moy sans crainte cette Monarchie, ni recevoir en repos ce que j'ay semé avec si grands labeurs. Dieu qui m'a fait cette grace qu'il fit à Jonas en me delivrant du ventre famelique de cette baleine, sçait combien voloutiers je voudrois avec des paroles plus douces pouvoir exposer l'article secret de nostre divorce, & n'estre pas contraint d'esventer ce que je voudrois ensevelir : mais le murmure public & la calomnie m'y forcent, & l'assurance que j'ay d'avoir plus de tesmoins de ses malefices, qu'il ne se trouveroit de voix pour l'exaucer, m'y convie.

Le Roy son frere oyant cette sienne fuite, & ma plainte, m'escrivit que si j'eusse creu son Conseil au retour de Paris, & traité sa sœur comme elle le meritoit, & comme l'information qu'il m'en avoit envoyé le consentoit, je serois hors de peine, & luy sans soucy de ses impertinences ; & dit tout haut en preference de ceux qui le voyoient disner, Les Cadets de Gascogne n'ont peu souler la Royne de Navarre ; elle est allée trouver les Muletiers et Chaudronniers d'Auvergne. Je vous jure (car nous avons desormais la perruque tonduë & blanche esgalement) que le respect qu'on doit au poil blanc me retient, & que je laisse à dire plus de choses que je n'en dis, me contentant de celles qui font voir, que je ne parle pas par cœur, ni en homme qui paye mal ses advertisseurs. Chauni qui luy a souvent parfumé son devant de storax, outre qu'il m'a servi de tesmoin que c'est le plus puant & le plus infect trou de tous ceux qui pissent, m'en a autrefois tant dit & de tant de fortes, qu'il n'y a quel les ignorans qui m'en puissent désavouër ; à qui j'apprens que cette perduë estant arrivée à Carlat, où elle fut long-temps non seulement sans daiz & lit de parade, mais aussi sans chemises pour tous les jours, elle commença de voir & de regarder, sur lequel de

ceux-cy courroit l'honneur de son nom, elle jetta l'œil sur son Cuisinier, pour ne chaumer point, se faschant d'attendre Duras qu'elle avoit envoyé vers le Roy d'Espagne querir de l'argent, encore que sa femme sa confidente craignat qu'elle ne luy enlevat son Causquet, luy preschat la confiance & le mérite de cet absent : Mais son desir infatigable esgal à la faim d'un limier qui cause une défaillance à qui ne se soule tous-jours, ne peut endurer cette attente ni celle de Saint Vincent, qui pour éviter la dépense estoit allé jusques à sa maison. Elle s'en prit au triste Aubiac comme ou mieux peigné de ses domestiques, qu'elle enleva de l'Escurie en la chambre, & s'en fit tellement picquer, que son ventre heureux en telle rencontre en devint rond & enflé comme un balon, vomissant en son terme un petit garçon, avec le secours d'une femme sage que la mere de ce picqueur pour l'amour de son fils y avoit conduite, assisté du Médecin du May, lequel outre sa profession, & de luy penser quelque apostume sur son derrière, luy servit à ce coup de porter ce jeune Prince nouveau Lysandre mal emmailloté en nourrice au village de l'Escoubiac là auprès, si fraîchement nay, que neantmoins pour le froid enduré du long chemin il en demeura pour tousjours privé de l'ouïe & de la parole, & pour ces imperfections, abandonné de l'amour & du soin de sa propre mere, qui ayant oublié les plaisirs de la conception, a long-temps permis qu'il ait gardé les Oisons en Gascogne, où Mademoiselle d'Aubiac son Ayeule l'a (tant qu'elle a vescu) preservé de mourir de faim, & depuis elle Gesilax de Firmaçon son beau-fils, qui monstre encore aujourd'huy par grande rareté ce gage de la Couronne à ceux qui le vont voir à Birac, où il l'entretient moyenant deux cens escus de pension que Goute Raquette luy va depuis quelque temps chercher à Usson & à Paris.

Plusieurs de ceux qui sçauront sa fécondité s'esmerveilleront avec raison qu'elle n'ait aussi tost retenu de moy que d'un autre, & feront divers jugemens de mon impuissance, au lieu d'attribuer ce secret à celuy qui ne permet point que la maison paillarde prospere : je m'en suis quelquefois esbahy moy-mesme, qui, Dieu mercy, ne suis pas des plus refroidis, & qu'il n'en déplaise à cette preude femme ay autant d'alduterins mal semez comme elle en divers endroits : mais je n'ay sceu onques deviner la cause de nostre compagnie sterile & infructueuse, ni pû l'attribuer aux raisons communes, bien que je sçache qu'à regret elle a souvent consenty à la force de mes desirs pour se donner volontairement en proye à mille, qui n'en eussent osé prétendre ni esperer aucune faveur, si luxurieusement effrontée elle ne les eût, pour parler intelligiblement, mis dessus ; entre lesquels on peut bien mettre Aubiac, Escuyer chétif, rousseau & plus tavelé qu'une truite, dont le nez teint en escarlatte ne s'estoit jamais promis au mirouër d'estre un jour trouvé dans le lit avec une fille de France, ainsi qu'il le fut à Carlat par Madame de Marie, qui trop matineuse fit ce beau rencontre, allant donner le bon jour suivant sa coustume à la Reyne, payant neantmoins cet officieux devoir avec la mort de son mary, que cette vertueuse Princesse entenduë au boucon du païs maternel fit empoisonner, espérant delivrée de cet obstacle & fortifiée des soldats que Romes cousin d'Aubiac estoit allé lever en Gascogne, se rendre Maistresse absoluë de la place, & en tirer ingratement ceux qui l'avoient liberalement receuë & mise à couvert : mais l'exemple de Duras les avoit fait

sages, qui revenu d'Espagne tout mutiné de trouver sa Dame pourveuë & avoir ignominieusement esté jeté par les espaules en danger de pis, si Misselac ne fût tout à propos arrivé au secours, sous prétexte d'avoir prodigalement employé ce que cette nouvelle Amazone avoit destiné pour me gueroyer, en gans parfumez, chevaux d'Espagne, & autres babioles du païs d'où il venoit : si bien que la garde renforcée, & son secours Gascon découvert, on luy conseilla familerement de trouver autre giste, & de vuidier promptement le logis. Ce qu'elle (peureuse & appréhensive) executa sur l'heure, partant avec la mesme confusion & desaroy qu'elle y estoit venuë, & parevenant par ses journées à Ivoy, maison de la Royne sa Mere ; où à peine arrivée elle fut du commandement du Roy par le Marquis de Canillac assiegée & prise avec son amant, lequel on trouva vilainement caché sous quelques ordures, sans barbe & sans poil ; l'ayant sa Maistresse ainsi deguisé de ses ciseaux mesmes, pour le sauver. Et apres que mille belles & persuasives paroles n'eurent pû gagner qu'il se fist mourir avant que tomber entre les mains de ses ennemis ; offrant luy montrer le chemin de cette genereuse & peu Crestienne resolution, s'il avoit le courage de la suivre. Je vous vois tout esmeuz d'une si miserable fortune, & connois que sa qualité vous incite à compassion, vous souvenans du nombre des Roys de son nom, sous lesquels vous avez heureusement estendu les bornes de ce Royaume, & valeureusement rabattu l'orgueil de vos voisins : & me deueil comme à vous de voir leur memoire offensée, & que cette ennemie de la vertu diminuë & obscurcië ainsi leur reputation : Mais il n'est point de race tant illustre, ni de famille tant renommée, qui ne puisse à la fin abastardir : ni rien de si pur ni de si parfait, qui souvent refondu, ne laisse à la fin quelque ordure. L'amour pourroit causer quelque erreur : mais infinies amours sont indignes d'excuses, lors mesmement qu'elles sont conceuës par un sale désir, guidé par l'effronterie, entretenuë par la volupté, ainsi que ces deshonestes plaisirs, dont la diversité vous estonne, & le vice augmente mon deshonneur, à la confusion de cette autre Alcine, qui pleurante, & à peine hors des bras du dernier amant, songe & invente d'autres moyens de prendre celuy qui l'a prise. J'excuse Canillac, quoy que vilainement il trahit celuy ; qui fioit sa sœur sur sa preudhommie, & je confesse (moy de qui la fragilité se laisse souvent emporter aux femmes) qu'il est très difficile de parer aux yeux & à la voix qui consulte notre ruine. Ce Marquis témoigne mon dire & plus né pour les affaires, que pour l'amour, qui preferant à la foy qu'il devoit à son Maistre, en chetif plaisir, se laissa piper aux artifices de sa prisonnière, oubliant son devoir, & quittant tout ce qu'il pouvoit pretendre de sa fortune, pour se rendre amoureux de cette amoureuse, & tellement jaloux, qu'il en sacrifia le pauvre Aubiac au soupçon, luy faisant faire son procès par Lugoly, & puis pendre & estrangler à Agueperse, tandis qu'au lieu de se souvenir de son ame & de son salut, il baisoit un manchon de velous raz bleu, qui luy restoit des bienfaits de sa Dame. J'admire qu'en ce genre de mort fut accomplie une prophetie ; car plusieurs qui s'en souviennent encore fort bien, vous tesmougeront que Aubiac accompagnant le Commandant de Saint Luc, lors qu'il vit cette Royne premierement, dit tout haut en la regardant attentivement, Je voudrois avoir couché avec elle à peine d'estre pendu quelque temps après. Il n'est pas tousjours bon de deviner, ces oracles ainsi expres sont à craindre, & m'estonne

que ceux qui ont hérité depuis eux d'une si précieuse & rare fortune, n'en ayant appréhendé pour le moins autant : mais on voit bien que les gibetz sont pour les mal-heureux & non pas pour tous les coupables. Canillac pour ce criminel, sur qui il exerça plutôt sa jalousie que sa vengeance, ne laissa pas de faire les doux yeux, & de soigner sa petite taille outre l'ordinaire, devenant en peu de temps d'aussi mal propre que je pourrois estre, coint & poli comme un beau petit amoureux de village : mais de quoy luy servit à la longue sa bien seance ? Cette inconstante, dont il cuidoit retenir la legereté sous la clef & sous l'inexpugnable forteresse d'Usson, se fâche de son ordinaire & coutumière façon de commander, & d'approcher de son ratelier ores l'un, ores l'autre, & souvent plusieurs à la fois, voulut devenir Maistresse & chercher à l'accoustumé dans le change, la pointe & l'esguillon de son appétit ; pour à quoy parvenir & sachant par expérience combien peut le desir sur la volupté, feint d'aimer, de se voir aimée, & consentant à l'importunité de quelques prières, elle esmeut & allume si bien son gardien, qu'enfin ses artificieuses caresses obtiennent sa liberté, sous promesses que ce qui sembloit estre seulement accordé pour lors chichement à la force, seroit prodigement départi par la volonté, lorsque libre & Maistresse d'Usson absolüe, elle pourroit sans apprehension vaquer à l'amour, & le tromperent en cette façon, car à peine eust elle obtenu que la garnison vuideroit, qu'elle remplaceroit des gens à sa devotion, & que son facile marquis cependant se retireroit à Saint Cirque cueillir ses pommes ; qu'ingrate de ce serviteur, elle ne peut plus ouïr seulement proferer son nom ; & rassurée d'une bonne troupe d'hommes qui luy fut envoyée d'Orleans, qui faillirent tost après à la traiter en fille de bonne maison ; elle se resoud de n'obeïr qu'à ses volontez, & d'establir dans ce Roc l'Empire de ses délices, où clause de trois enceintes & tous les grands portaux murez, Dieu sçait & toute la France les beaux jeux qui en vingt-ans se sont jouëz & mis en usage. La Nanan de l'Arétin ni sa Sainte ne sont rien auprès. Il est vray qu'au lieu des galands qui souloient adoucir sa vie passée, elle a esté reduitte à faute de mieux, à ses Domestiques, Secretaires, Chantres & Metis de Noblesse, qu'à force de dons elle y attiroit, dont la race & les noms inconnus à leurs voisins mesmes, sont indignes de ma memoire, hormis celuy tant célébré de Pominy, fils d'un Chaudronnier d'Auvergne, lequel tiré de l'Eglise Cathedrale de la ville, d'enfant de Cœur parvint, par le moien d'une assez belle voix qui le discernoit d'avec ses semblables, à la musique de cette Royne, s'introduisant enfin de la Chapelle à la Chambre, & de la Chambre au Cabinet pour Secrétaire ; où longuement il a tenu diverses parties, & fait diverses depesches : c'est pour luy que les folies se sont si fort augmentées, qu'on en pourroie fournir des justes volumes : c'est de luy qu'elle dit qu'il change de corps, de voix, de visage, & de poil, comme il luy semble : & qu'il entre à huis clos où il luy plaist : C'est pour luy qu'elle fit faire les lits de se Dames d'Usson, si hauts qu'on y voyoit dessous sans se courber, afin de ne s'escorcher plus comme elle fouloit les espauls, ni le fessier, en s'y fourrant à quatre pieds toute nuë pour le chercher : c'est pour luy qu'on l'a veüe souvent tastonner la tapisserie pensant l'y trouver, & celuy pour qui bien souvent en le cherchant de trop d'affection, elle s'est marquée le visage contre les portes & les parois : c'est pour luy que vous avez tant ouï chanter à nos belles voix de Cour, ces ers faits par elle mesme :

A ces bois, ces prez, & ces autres
Offrons les yeux, les pleurs, les sons,
La plume, les yeux, les chansons,
D'un Poëte, d'un Amant, d'un Chantre.

Et c'est luy qu'elle nomme maintenant ce méchant homme, qu'elle dit luy gaster tous ses serviteurs, & pour qui son œil droit luy bat sans y faillir, lorsque contre elle il brasse quelque malice. Qui d'entre vous peut ignorer ces mysteres tant apperceus des moins clairvoyans, ni s'esbahir desormais de nostre divorce, ayant tant de justes raisons de nostre separation ? Je suis un peu longtemps en ce discours contre ma coustume, & connois que je sasche peut-être quelqu'un à qui la continuation de ma honte estoit agreable : mais le fat me touche, & faut que pour un coup je me soule aux depens de vostre patience & de mon loisir. Ce Manifeste qui peut-estre vivra plusieurs siecles, apprendra quelque jour aux esprits amis de vérité, ce que j'ay voulu taire tant par modestie à nostre Saint Pere, & au Cardinal de Joyeuses Commissaire par luy deputé pour m'ouïr sur les causes de nostre repudiation ; n'ayant sur vingt & deux chefs en son interrogatoire respondu chose qui luy puisse apporter deshonneur & blasme, si ce n'est peut-estre sur celuy qui s'enquist de moy, si jamais durant le mariage nous avons eu communication ensemble : où je respondis contraint par la verité, que nous estions tous deux jeunes au jour de nos nopces, & l'un & l'autre si paillards, qu'il estoit plus qu'impossible de nous en empescher. La description particuliere de sa vie ne me dément point, je m'en rapporte à ses amis mesmes, si tant est que son vice lui en ait encore laissé quelqu'un, & me soumetts à leur jugement, quoyque fort suspect, si j'ajoute ou diminue au conte, aimant beaucoup mieux en dire trop peu, que m'obliger à deduire tout. Tant & si diversifiées sont & ont esté jusques ici ses affectations, ou plustost ses foibles (car ainsi faut-il baptiser ses jalousies & dernieres fureurs amoureuses) qui commencerent à Bonivet & qui ont tousjours continué depuis ; c'est bien loin de ce que sa bonne fortune luy promettoit, l'ayant fait naistre d'un des plus grands & Magnanimes Roys de la terre, de la voir aujourd'huy valeter de la sorte, & tellement reduitte du trot au pas, que de Roynë elle soit venuë Duchesse, & de legitime Espouse du Roy de France, amante passionnée de ses valets. Partant on ne sçauroit justement s'offenser pour elle contre Madame de Guise, qui discourant une fois du ravalement de sa gloire, chanta fort à propos une vieille chanson de son temps, dont le refrain estoit :

Margot Margueritte en haut,
Margot Margueritte en bas,
Margot Margueritte.

Tellement on l'avoit deshonorée, & de grande qu'elle souloit estre, d'un chacun mesprisée & rangée au petit pied, Dieu le causanant, dont irreligieuse elle fouille les sacrés mysteres, osant impudemment depuis plusieurs années trois fois la semaine faire sa Pasque dans une bouche aussi fardée que le cœur, la face

plastrée & couverte de rouge, avec une grande gorge découverte qui ressembloit mieux & plus proprement à un cul, que non pas à un sein. J'ay horreur de me scandaliser, moy qui ne suis pas des plus entendus du Royaume au fait de ma Religion, de voir ainsi prophaner cette sainte reconciliation avec son Dieu, & de recevoir si souvent e Sauveur du monde en un corps si pollu de paillardes voluptez si tant est (car les contemplatifs en doutent), que l'hostie que hypocritement elle feint recevoir, soit consacrée ; ne pouvant quelquefois parmi la pitié que j'en ay m'empescher de rire des extravagantes jalousies, & fortes passions qu'on raconte de ses amours, qui la transportent plus souvent à mespriser ce qu'elle voit, & à croire ce qui n'est point, ores cherchant furieuse & chaude ses Rufiens en tous les endroits les plus cachez de s maison, bien qu'elle ne puisse ignorer qu'ils sont autre part ; & ores les voyant & oyant, & toutefois se persuadant que sous leur image ce soient d'autres qui taschent à la decevoir, & à luy méfaire. Vous sçavez les particularités mieux que moy qui n'en sçay que trop : mais peut-estre vous ignorez que l'enorme laideur, & le peu de merite, & la qualité de ce Pominy, a fait croire à plusieurs qu'il y ait eu du charme, quoy qu'elle ait esté plusieurs fois charmée de mesme, s'arrestant sur ce qu'à Usson, on luy voyait ordinairement pendu au col entre la chemise & la chair, une bourse de soye bleuë, en laquelle ses plus privez avoient decouvert une boîte d'argent, dont la superficie gravée representoit naïvement (outre plusieurs differents, & inconnus caracteres) d'un costé son portrait, & de l'autre son chauderonier, qui l'avoit par un si solemnel serment obligée à ne l'ouvrir de certain temps, ni à s'en dessaisir, qu'elle confessoit la larme à l'œil, ni l'osoit, ni le pouvoir faire. On m'a dit que le Roy son pere fut par Madame de Valentinois ensorcelé de mesme : & je n'ignore pas qu'en niant la magie, on refute en un mesme temps, non seulement la propriété des herbes, des plantes, des mineraux, des corps celestes, & des paroles ; mais aussi la propre puissance de Dieu en la vertu des substances separées. Que ce soit charme ou non, à d'autres en soit la dispute, si faudra-t-il que l'on avouë qu'il se trouve pour ensorceler, des matieres bien-aisées & disposées, & une âme fort attachée au corps, & un corps fort subject au charnel plaisir : dont le frequent usage l'a reduitte à ne pouvoir plus ouïr proferer, sans rogir ni penser qu'on se mocque d'elle, ces mots (honneur & vertu) qui sont ennemis & directement opposés à sa profession. Il n'est point de juge meilleur que la conscience, elle nous esveille & nous poind ordinairement en la partie la plus dolente : aussi cette Dame au beau avoir demeuré enfermée, & n'avoir veu que petites gens dans Usson ; elle a été pourtant trompettée par tout le monde, & s'est renduë subjecte à ne pouvoir plus tolerer qu'on tousse, rie, ou parle bas en sa presence, tant le soupçon & le mefy d'elle-mesme luy fait apprehender le discours de ses actions. Je suis maintenant à peu prez exempt de sa honte, & delivré desormais de m'en souvenir, & suis assez bon compagnon pourveu qu'elle en valut la peine, pour luy en dire par humeur encore deux mots aussi bien que les autres.

Jusques icy ses fautes n'estoient que fleurs, quoy qu'assez mal couvertes, l'aage, le temps, & sa volontaire prison d'Usson en faisoit tolerer & cacher quelques-unes : son habitude au mal avoit desja lassé les langues plus

babillardes, & sa longue absence avoit desja fait oublier son nom parmy les Grands : mais pour couronner son œuvre & donner la dernière main à ce beau discours de sa vie, elle a voulu venir revoir la France, & n'a pas voulu moins choisir que Paris & les yeux de la Cour, pour servir de Theatre & de tesson à son histoire qu'elle promet d'écrire ci-apres. Vous y voyez aussi clair que moy : mais oyez en quelle façon un fourrier bien instruit luy marque l'Hostel de l'Evesque de Sens, lors qu'aprez son arrivée en cette ville elle y alla premièrement loger :

Comme Roine elle devoit estre
Dedans la Royale maison :
Mais comme putain c'est raison,
Qu'elle soit au logis d'un prestre.

Je ne croy point que si on peut avoir quelque ressentiment d'honneur, qu'elle n'ait d'étranges eslancemens dans son ame autant de fois qu'elle tourne ses yeux vers le Louvre, se representant qu'elle en a perdu la demeure pour un sujet dont une plus chaste qu'elle ne se sçauroit souvenir sans rougir. O insigne impudence, & manifeste effronterie ! à huis ouverts, aux yeux de tous, & faisant gloire de son amy, exercer publiquement sa lubricité, & ayant depuis son enfance fait banqueroute à la renommée, il ne luy chaut qu'on ne l'estime, pourveu qu'on satisfasse à ses ords desirs. Elle tint bon à Paris, & au bois de Boulogne environ six semaines : mais ne se pouvant plus passer du mâle, plaignant le temps, & ne voulant plus demeurer oisive, elle envoya chercher un petit valet de Provence, qu'avec six aunes d'etoffe elle avoit annobli dans Usson en l'absence de Pominy depuis quelques années, dont l'éloignement luy causoit tant d'impatience, qu'à son arrivée pour luy faire payer le chaume, ils demurerent souvent ensemble enfermez dans un cabinet des sept & huit jours, avec les nuits entieres, sans se laisser voir qu'à Madame de Chastillon, qui cependant rongeoit son frein à leur porte, & aydoit seule à tenir ce secret que tout le monde sçavoit assez. Cet Amant est ce datte pour qui vous voyez encore tant de palmes en ses tapisseries ; C'est ce petit chichon tant reclamé en ses voluptez ; C'est ce fils d'un Charpentier d'Arles jadis laquais de Garnier l'un des Maistres de ma Chapelle ; C'est ce mignon que le Jeune Vermond luy tua deux mois apres qu'il fut arrivé à Paris devant la portiere de son carosse ; C'est celuy dont la perte luy fit changer le quartier Saint Antoine avec Saint Germain ; Celuy pour qui depuis elle a fait écrire & chanter tant de vers ; & celuy pour qui l'on ne peut seicher ni tarir ses larmes, quoy que le bien disant Beaujumont en ait entrepris la cure, secouru des plus fortes persuasions que le Mayne son assistant peut tirer dans toutes les fleurs du bien dire. Que vous en semble ? ne devoit elle pas bien venir à Paris pour tesmoigner ce bel amandement de vie passée ? & elle la plus difforme femme de France, n'estoit-ce point à elle à faire venir des moines reformez ? qui fera celuy qui lira ses actes heroïques (car ils ne manqueront pas d'Escrivains), qui n'admire son inclination au putanisme, & qui n'approuve qu'ils meritent d'estre enregistrez au bordel ? Ceux qui sous cette esperance de liberalité la louënt en leurs presches, luy adressent des livres, ou qui écrivent à sa louange,

ont beau luy attribuer des qualitez qui ne luy sont pas deües, car la veritable traditive, que malgré eux les siecles futurs conserveront de pere en filz immémorialement, faisant fort qu'ils sont des menteurs autant plein d'avarice, & de flatterie, comme elle est ennemie de la vertu. Et qu'il ne soit vray, lequel d'entre vous l'a jamais veu faire une bonne œuvre, qui ne se puisse aussi-tost refuter avec une mauvaise ? Avez-vous veu jamais personne qui se loüe de ses bien-faits, vous qui oyez ordinairement reprocher ses ingrattitudes ? Avez-vous jamais veu ses amans, excepté quelques-uns, enrichis de ses mains, vous qui voyez les prisons pleines de ceux qu'elle appauvrit ? l'avez-vous jamais veu au sermon sans dormir, à vespre sans parler, & à la Messe sans son Ruffien ? Je croy que plusieurs, luy peuvent bien avoir veu maintesfois prodiguer des aumosnes : mais lequel est-ce qui luy a jamais veu payer de bon cœur une dette ? Elle donne, je le sçay bien, & à mes depens, la disme de toutes ses ventes & pensions aux Convents & Monasteres tous les quartiers : mais aussi elle retient, dont j'ay grand pitié, le salaire de ses Domestiques, & de ceux qui le long de l'année luy ont fourny leurs denrées, & leur labour, En somme tout son fait n'est qu'apparence & ostentation, sans aucune estincele de devotion ni de pieté : Je la connois de longue main. Si ces raisons de nostre divorce ne satisfont à ceux qui blasment nostre separation, & qu'il n'y ait point en son vilain corps prou de sujet pour l'abandonner, je vous deduiray une autre fois à loisir les monstruosités de son esprit, où vous n'aurez pas moins occasion de rire que de vous esmerveiller ; le sujet m'emporte, & plus je parle, & plus je trouve à parler : car quoy que j'eusse resolu de faire, en cet endroit, ma pensée est de n'aigrir point davantage mon Manifeste. J'ay toutesfois Beaujumont avec son bec jaune qui me semond de luy donner place, & luy faire joüer son personnage sur cet eschafaut. Ce Beaujumont metz nouveau de cette affamée, Idole de son temple, le veau d'or de ses sacrifices, & le plus parfait sot qui soit jamais arrivé dans la Cour, lequel introduit de la main de Madame d'Angluse, instruit par Madame Roland, civilisé par le Mayne, & nagueres guery de deux poulains par Penna le Medecin, & depuis souffleté par Delain, maintenant en possession de cette pecunieuse fortune, sans laquelle la pauvreté luy alloit saffraner tout ainsi que la barbe le reste du corps : Je n'ay que faire de vous conter leurs privautez, elles sont prou conneuës, ni rechercher dans la memoire, pour vous particulariser leurs amours, aucuns termes de mignardises & de douceurs : car ce seroit tout autant comme d'appeller des gros mâtins de boucherie Marjolaine ou bien Romarin. Je vous diray seulement en passant, que cette Dame ayant depuis long-temps deux loups aux jambes, elle a voulu que son amant ait des caustiques aux bras, afin qu'en leurs embrassements, & lorsque goulument elle le revoit à jambes ouvertes, il y puisse venir pareillement à bras ouverts ; & cecy soit dit comme seulement en passant & par parenthese dudit Beaujumont, attendant de voir la fin de leur insolence, & si ce cheval felon luy fera point enfin comme aux autres perdre l'arçon. Pour elle vous n'ignorez ce que je luy suis, & la memoire du passé m'oblige à n'en point dire davantage : mais à luy souhaitter quelque amandement & à prier Dieu qui seul peut toucher le cœur, de luy départir quelque goutte de repentance, sans laquelle l'eau de cire & de chair qu'elle alambicque pour son visage, ne peut cacher ses imperfections ; l'huile de

jassemin dont elle oinct chaque nuit son corps ; empescher la puante odeur de sa
reputation ; ni l'eresipele qui si souvent luy pele les membres, changer &
depouiller sa mauvaise peau.